

畿輔通志卷一

帝制紀一

詔諭一

順治元年

登極

詔曰我國家受

天眷佑肇造東土

烈祖邁圖鴻緒

皇考彌廓前猷遂舉舊邦誕膺

新命迨朕嗣服雖在冲齡締念紹庭永綏厥位頃緣賊氛游熾極禍
明朝是用託重親賢救民塗炭乃方馳金鼓旋奏澄清旣解倒懸
非富天下而王公列辟文武羣臣暨軍民耆老合詞勸進懇切再

三乃於本年十月初一日祇告

天

地

宗廟

社稷卽皇帝位仍建有天下之號曰大清定鼎燕京紀元順治緬維
峻命不易創業尤難況當改革之初更屬變通之會爰乃酌古準
今揆天時人事之宜庶幾吏習民安彰

祖功

宗德之大

順治三年

上諭朕惟

太祖

太宗創業東方民淳法簡大辟之外惟有鞭笞朕仰荷

天庥撫臨中夏人民既衆情僞多端每遇奏讞輕重出入頗煩擬議律例未定有司無所稟承爰敕法司官廣集廷議詳繹明律參以國制增損劑量期於平允書成奏進朕再三覆閱仍命內院諸臣校訂妥確乃允刊布名曰大清律集解附例爾內外有司官吏敬此成憲勿得任意低昂務使百官萬民畏名義而重犯法冀幾刑措之風以昭我

祖宗好生之德子孫臣民其世世守之

順治十年閏六月

諭內三院曰考之洪範作肅爲時雨之徵天人感應理本不爽朕朝夕乾惕冀迓時和乃茲者霖雨匝月歲事堪憂都城內外積水成渠房舍頽壞薪桂米珠小民艱於居食深可軫念揆厥由來皆朕

不德所致朕當一意修省祇懼天威爾大小臣工俱宜各盡職業共圖消弭京城內外該部確察被災戶口據實奏聞在外凡有水災地方督撫察明被災分數具奏請卹以昭朕軫恤窮黎實意

順治十一年二月

諭戶部曰四海蒼生皆朕赤子饑寒轉徙深切痼瘼前各督撫疏奏災荒等處已經查照分數酌量蠲免各府州縣衛所等官務在實力奉行不得混徵徒飽貪腹極荒地方非蠲免所能救者該督撫速行查奏另加恩恤至於畿輔重地房屋田土多經圈占加以去年水荒特甚尤爲困苦朕夙夜焦思寢食弗甯亟宜拯救庶望生全但荒政未修倉廩無備若非頒發內帑何以濟此急需茲特發庫貯銀十六萬兩

聖母皇太后發宮中節省銀四萬兩朕又發御前節省銀四萬兩遣

滿漢大臣分赴八府地方賑濟督同府州縣衛所各官量口給散務使饑民均霑實惠

順治十二年

諭禮部朕維帝王敷治文教是先臣子致君經術爲本自明末擾亂日尋干戈學問之道闕焉未講今天下漸定朕將興文教崇經術以開太平爾部卽傳諭直省學臣訓督士子凡理學道德經濟典故諸書務要研求淹貫博古通今明體則爲真儒達用則爲良吏果有此等實學朕必不次簡拔重加任用又念先賢之訓仕優則學仍傳諭內外大小各官政事之暇亦須留心學問俾德業日修識見益廣佐朕右文之治特諭

順治十二年八月

諭工部曰畿輔之地乃天下根本必加意安養使民生樂業方能自

近及遠漸致太平前爾部會戶禮兵三部覆奏修築運河決口議將直隸八府州縣節年所欠各部寺錢糧速行催解以濟修河急用朕念畿內地方人民艱苦房地屢經圈撥水旱連歲相仍旣缺養贍之資俱有身家之累而厯年積欠一旦並徵其何以堪殊非加惠近畿篤厚根本之意朕心深爲不忍爾部仍會同各部將修築決口應另用何項錢糧悉心籌畫確議速奏其直隸八府州縣順治八年至十一年未完錢糧實欠在民者悉與蠲免

順治十三年八月

諭戶部曰順天府屬係京畿根本重地年來水旱頻仍小民失業生計蕭條較他處爲獨苦今歲復霖雨飛蝗相繼爲災已蒙

皇太后發帑賑濟朕因念被災窮黎救死不贍若以國賦亟需責之照舊輸納轉徙溝壑勢必難免恐非所以仰宣

皇太后特施拯恤之德意爾部速將順天府屬各州縣災傷分數察勘明白分別重輕酌量蠲免以昭嘉惠元元至意

順治十四年十二月

諭戶部曰

皇太后聖體違和今已大豫朕心深爲欣慰八旗及畿輔人民應加恩賚以洽歡心茲發內帑銀十萬兩一半給八旗兵丁一半遣官賑濟畿輔貧民爾部卽遵諭行

順治十六年十一月

諭工部前代陵寢神靈所棲理應嚴爲守護朕巡幸畿輔道經昌平見明朝諸陵殿宇牆垣傾圯已甚近陵樹木多被斫伐向來守護未周殊不合理爾部卽將殘毀諸處盡行修葺現存樹木永禁樵採添設陵戶令其小心看守責令昌平道官不時嚴加巡察爾部

仍酌量每年或一次或二次差官察閱勿致疎虞特諭

順治十七年

諭修明莊烈愍帝陵朕惟膺圖承祚統紹百王而創法宏模情殷勝國厯觀史冊興亡之迹考其治亂得失之由僉以政荒遂干天譴邦國旣隳士民罔懷惟有明莊烈愍皇帝實治理之宏圖惜贊襄之莫逮以致寇氛犯闕宗廟爲墟追念喪師匪因失德朕每念及此未嘗不惻焉傷心也頃者兩幸昌平周視明代陵隧躬親盟奠俯仰徘徊以彼諸陵規制咸壯麗相因獨愍帝之陵荒涼卑隘典物未昭原彼當年孜孜求治宵旰不遑祇以有君無臣薄海鼎沸洎乎國步傾危身殉社稷揆諸正終之例豈同亡國之君朕於憑弔之餘撫往興悲不禁流涕因欲繕治陵寢丹堊几楹慰靈爽於九原彰異數於奕禩迺核少府金錢悉小民正供儻增工徒之費

殊乖賦式之經然終不忍聽其闕略用是布告方州開導忱悃交相輸助聿新礪耄以肅松楸

康熙八年六月

諭戶部朕纘承

祖宗丕基乂安天下撫育羣生滿漢軍民原無異視務俾各得其所乃愜朕心比年以來復將民間房地圈給旗下以致生民失業衣食無資流離困苦已極深爲可憫以後圈占民間房地著永行停止其今年所圈房地俱著退還民間爾部卽速通行曉諭昭朕加惠生民至意至於旗下無地亦難資生應否將古北等口邊外空閒之地撥給耕種著議政王貝勒大臣會同確議具奏特諭

康熙十年十二月

諭兵部併督捕衙門直隸重地理宜肅清邇來盜賊繁多大爲民害

地方官怠玩不能力行禁戢以致劫掠時聞眞盜捕獲者少良民株累甚多皆因防汛官員止於降罰帶罪緝拏其間有失事最多不能盡職者仍令留任愈致貽悞今盜賊應作何禁戢嚴拏及以盜案降罰幾次者作何處分爾部再行定議具奏至京城內外盜賊棍徒肆行無忌作何責成官役嚴行緝拏亦著一併議奏特諭

康熙十四年九月

諭禮部往代帝王陵寢所在地方理宜守護以安神靈朕近行幸湯泉道經昌平見明朝諸陵殿宇雖存戶牖損壞附近樹木亦被摧殘朕心深爲憫惻爾部卽嚴加申飭守陵人戶令其小心護防仍責令該地方官不時稽察勿致仍前怠玩以副朕優禮前代之意特諭

康熙十七年十一月

諭內閣學士噶爾圖屯泰曰遵化州所屬有附近湯泉之婁子山袁各莊啟新莊梁家莊石家莊此五莊供辦徭役其一年地丁錢糧俱令蠲免如今歲已經徵收准於來歲蠲免至鮎魚關城內外居民七十一家免其一年正供外仍每戶賜銀二兩爾等從戶部支取親閱分給所蠲錢糧令州官卽徧諭婁子山等莊及鮎魚關居民務使均沾實惠

康熙十八年七月

諭戶部工部朕御極以來孜孜求治期於上合

天心下安黎庶夙夜兢惕不敢怠荒乃於本月二十八日巳時地忽大震皆因朕躬不德政治未協大小臣工弗能恪共職業以致陰陽不和災異示儆深思愆咎悚息靡甯茲當力圖修省以迓

天庥念京城內外軍民房屋多有傾倒無力修葺恐致失業壓傷人

口五城御史不能逐戶細察止聽屬員開報於朕加恩軫恤之處不得均霑實惠著另遣滿漢御史詳加稽察其窮苦兵丁出征在外房屋毀壞妻子露處無力修葺朕心更爲憫念該部卽行令八旗都統副都統叅領親行詳察毋致遺漏

康熙十八年八月

諭戶部通州三河等處遇地震壓死者甚爲可憫戶工二部會同將旗下及民人房屋并寺廟被壓之人速察明數目遣司官四員前往驗視動支帑銀帶往有主收殮者給予銀兩無人承認者著所遣司官同地方官設法埋瘞

康熙十九年二月

諭戶部朕聞宣府等處歲值大祲吾民乏食鬻賣妻子以自求活夫人孰不愛其家室哉至欲延一朝夕之命割其所親憐惻莫甚焉

其遣爾部郎中明格禮馳驛速往會同地方官賑濟急拯艱厄以紓朕懷

康熙十九年四月

諭戶部前差爾部侍郎薩穆哈賑濟直隸饑民至春麥收成之時停止今聞春麥已枯秋成難定其間災重地方麥旣無望饑民何以聊生仍著薩穆哈等前往賑濟直接秋收勿令災黎有失生理

康熙二十年三月

上奉

太皇太后幸遵化溫泉

諭內大臣等曰今當田禾發生之候必須遵路而行安營時令於道途村莊沿途荒野處駐扎出入毋踐田禾見遣戶部司官隨後稽察遇有駐扎處或出入之時蹂躪田禾者嚴行議處回鑾時仍從

原路行朕將親察之

康熙二十年四月

上駐蹕三屯營西南

命學士禧佛往諭遵化州知州鄭喬生曰鮎魚池周圍地畝不許蹂踐雖屢經嚴諭未必無礙田禾著知州親行細察所傷地畝若干應納錢糧若干俟回鑾日轉奏

康熙二十年五月

諭戶部比年以來宣府大同疊罹饑饉而邊外蒙古亦復凶荒故發宣大存貯米石盡用賑濟朕思邊境糧儲所關最要古稱九年六年之蓄蓋合侯甸藩畿通爲之計豈僅謂公廩之充盈已也養人足食道貴變通可發京倉米二十萬石前運宣大備用其運送米石用就近地方驛站車夫不致糜費爾部核議具奏

康熙二十年九月

諭戶部頃者朕巡行近畿至霸州地方見其田畝窪下多遭水患小民生計無資何以供納正賦其該州見在被淹田地應徵本年錢糧著察明酌量蠲免以示朕勤恤民隱至意爾部卽遵諭行特諭

康熙二十年十一月

諭大學士等曰朕頃駐固安任邱聞戶部官員將各州縣均派草豆甚爲擾民工部向民間私借柴炭亦多擾民俱宜嚴禁又聞部院各官借稱預備差遣無故傳集窮民跟隨苦累俱宜嚴禁每次巡幸騷擾百姓者多係部院各官可傳諭嚴飭以後毋得再蹈前轍

康熙二十一年二月

諭直隸巡撫格爾古德曰凡爲官者承貪吏之後名譽甚易承良吏之後名譽甚難金世德于成龍居官有聲爾繼其後得名必遲爾

毋欲速以求名速則恐致擾民直隸旗下莊頭與民雜處朕聞所
在凶惡莊頭自以旗下倚恃其主甚爲民害爾莅任後加意嚴查
務期懲創卽管皇莊者亦毋寬宥

康熙二十一年七月

諭吏部圖治首在安民勸善莫先懲惡必咨詢廉訪責有專官而後
民隱得以上聞奸頑爲之斂戢近聞直省各地方多有紳衿勢要
土棍豪強及旗下凶惡人員并莊頭等縱惡恣行武斷鄉曲有司
畏威而不敢問大吏徇隱而不能糾非特遣大臣巡察難以祛除
積弊直隸爲畿輔重地尤當首先澄清今應遣大臣一員前往會
同該撫巡歷地方有勢要豪強旗人莊頭大爲民害者廉訪真實
惡蹟指名題叅重加懲處以警奸徒用安良善副朕移易風俗愛
養民生至意應遣大臣爾部卽開列具奏特諭

康熙二十二年四月工部題修

孝陵五空橋甬道估計工價銀兩

上曰

陵寢關係重大前監修各官草率修理因致損壞今若以節省之故估價短少錢糧不敷將舊存甌石充用恐不堅固甯使價值寬餘務令永遠堅固著重修

陵寢堂司官詳勘議奏

康熙二十三年三月

諭戶部民爲邦本必年穀順成家給人足乃愜朕撫育羣生之意比者巡行近畿見閭閻生計僅支日用乃米價漸貴民食維艱又聞河南地方年歲荒歉所在苦饑小民無以資生恐致流離失所朕心深切軫念直隸應作何平糶及勸諭捐輸河南應行緩徵併鼓